

四庫全書

集部

欽定四庫全書

御定歷代題畫詩類卷八十三目錄

花卉類

戲題墨畫梅花

宋李綱

墨梅

宋朱子

墨梅

宋張栻二首

墨梅

宋呂居仁

墨梅

宋張子文

墨梅

宋僧祖可

墨梅

金劉仲尹十首

墨梅

金楊邦基

墨梅

金趙秉文

水墨梅花

元戴表元

墨梅偶賦

元王惲

墨梅圖

元袁楠二首

題墨梅

元馬祖常

墨梅 元宋无

題墨梅圖 元蒲道源

夢題墨梅 元揭傒斯

題畫墨梅 元吳萊

墨梅 元傅若金三首

墨梅 元宋聚

次韻題墨梅 元黃潛

墨梅 元李孝光

題墨梅卷子

元成廷珪

墨梅

元成廷珪

墨梅

元黃石翁

題墨梅

元吳鎮二首

題墨梅圖

元王冕二首

題墨梅

元劉永之三首

墨梅

元倪瓚

墨梅

元馬臻

墨梅 元蕭和

墨梅 元張復亨

墨梅 元錢惟善

墨梅 元趙孟堅

題畫墨梅 元陶宗儀二首

墨梅 元張庸

墨梅 明貝瓊

墨梅 明徐賁

題墨梅

明練子寧

題墨梅

明丘潛

題墨梅

明鄭真

墨梅

明李晔

題墨梅贈楊稷

明金幼孜

墨梅

明陳輝

墨梅

明倪岳

題畫梅

元陳旅

題畫梅

元王冕四首

應教題梅

元王冕

題畫梅

元貢性之十一首

題畫梅

明劉基

畫梅

明方孝孺

畫梅

明牛諒

題畫梅

明朱經

畫梅

明王誼二首

自題畫梅

明金琮

題梅送友

明徐章

題畫梅

明許天錫

畫梅

明陳淳

題畫梅

明秦旭

題畫梅

明謝士元

題畫梅

明徐渭二首

畫梅

明僧大遂

畫梅

明僧清遠二首

御定歷代題畫詩類卷八十三目錄

欽定四庫全書

御定歷代題畫詩類卷八十三

花卉類

戲題墨畫梅花

宋 李 綱

道人畫手真三昧力挽春風與遊戲露枝煙蕊忽嫣然
自得工夫畦徑外由來黑白無定姿濃淡間錯相參差
炯如落月耿寒影翳若宿霧含疎枝羣芳種種徒繁縟
脫略丹青尤拔俗妙質聊資陳氏煤幽姿好伴文生竹

世呼墨竹為墨君此花宜稱墨夫人鉛華不御有餘態
世間顏色皆非真年來妙觀齊空色天花時露真消息
試煩幻出數十枝不費梁谿一九墨

墨梅

宋朱子

夢裏清江醉墨香
寒枝瘦凜冰霜如今白黑渾休問
且作人間時世妝

墨梅

二首

宋張栻

眼明三伏見此畫
便覺冰霜抵歲寒
喚起生香來不斷

故應不作墨花看

日暮橫斜又一枝水邊記我獨吟時不妨更作江南雨
併寫青青葉下垂

墨梅

宋呂居仁

嶺南十月春漸回妍暖先到前村梅問君何處識此妙
一枝冷豔隨霜開長江凜凜欲崩岸乃見好事移牆隈
初凝滲漉入瘴霧更恐寂寞埋煙煤微風不動暗香遠
淡月入戶空徘徊坐看粉黛化羶惡豈但桃李成興臺

我行萬里厭窮獨疾病未已心先灰對此不覺三歎息
恐是轉側同南來異鄉久處少意緒破壁相對無根荄
古來寒士每如此一世埋沒隨蒿萊遁光藏德老不懼
肯與世俗相追陪輪囷離奇一作多見用犧尊青黃木
濩落為災含毫吮墨去顏色况自不必須穿栽歲窮路
遠莫惆悵此去保無蜂蝶猜

墨梅

宋張子文

筆端喚醒玉梅魂滿袖春風不見痕未許卷簾新月上

却教煙雨惱黃昏

墨梅

元僧祖可

不向江南冰雪底
乃於毫末發春妍
一枝無語淡相對
疑在竹橋煙雨邊

墨梅

十首

金劉仲尹

瘦損昭陽鏡
裏春漢家公主
奉烏孫淚痕
滴盡穹廬月
誰道神香解
返魂

絕纓人醉燭花殘
主意方濃未厭歡
十五瓊兒梳洗薄

琵琶才許近簾彈

生憎施粉與施朱
換骨玄都亦自姝
疎影冷香題不到
夢驚煙雨暗西湖

趙郎愛香人不知
羅浮山下有佳期
春寒徹骨角聲起
才記參橫月墮時

君王鳳駕九龍池
後輦傳呼召雪兒
狼藉玉臺銀燭暗
丁香小麝印宮眉

鐘鼓沈沈度苑牆
玉繩初直殿東廂
荀妃早發雞鳴埭

殘月微分燭下妝

衡州何處問花光
抹月批風只欠香
安得江南斷腸句
為題風雨浣啼妝

高髻長蛾滿漢宮
君王圖玉按春風
龍沙萬里王家女
不著黃金買畫工

古絹誰藏謝女真
天寒翠袖一招魂
江山嫁盡風流夢
雪滿冰溪月挂村

妙畫工意不工俗
老子見畫只尋香
未應塗抹相欺得

政自不為時世妝

墨梅

金楊邦基

粉蝶如知合斷魂啼妝先自怨黃昏
華光筆底春風老
寂寞嶺南煙雨痕

墨梅

金趙秉文

墨師不作脂粉面却恐傍人嫌我真
相逢莫道不相識
夏馥從來琢玉人

水墨梅花

元戴表元

江海歸來見似人，離披猶自少風塵。
何如淡月山莊夜，百幅清溪亂寫真。

墨梅偶賦

元王惲

梅華天質本紅黃，玉潔冰清徹骨香。
近為世間貪豔客，硬隨時世作新妝。

墨梅圖

二首

元袁桷

鐵石冰霜百世身，疎明瘦直一生真。
玄雲借我凌寒便，直上鉤天試早春。

雪繭輕蒙絕點塵小窗晴日得橫陳夢回猶記溪橋路
黯淡相看喜似人

題墨梅

元馬祖常

花開不占洛陽春野店山橋雪月新豈是歲寒偏偃蹇
還愁金谷墜樓人

墨梅

元宋无

生意玄煙裏春工毛穎中枝頭兩三蕊開不假東風似
到孤山下斜枝入眼中分明幾點雪欲折又成空

題墨梅圖

元 蒲道源

春風不解惜瓊英，可是招魂有客卿。
記得小橋曾度處，數枝和月浸溪明。

夢題墨梅

元 揭傒斯

霜空冥冥江水暮，江上梅花千萬樹。
無端折得一枝歸，一雙蝴蝶相隨飛。

題畫墨梅

元 吳萊

北風吹倒人，古木化為鐵。
一花天下春，萬里江南雪。

墨梅

元 傅若金

天涯不見遙相憶
牕外重逢乍欲迷
彷彿空山明月夜
一枝初出古牆西

題墨梅

二首

元 傅若金

老樹亞晴空
疎花帶寒野
風流不自惜
澹泊從人寫
歲晏孰能娛
空山少來者

孤花何婉婉
玉立含幽素
短短時出橋
疎疎或臨路
生疑簷下月
半照牆西樹

墨梅

為李華
遠作

元 宋 聚

風香月影雪肌膚朔客晴牕看畫圖
江北江南數千里
夢魂何處覓西湖

次韻題墨梅

元 黃 潛

一自攜家湖水東放舟時度玉花叢
因君貌得橫斜影
閒却孤山月一蓬

墨梅

元 李 孝 光

銀蟾呵春墨花碧香落江南濃欲滴
孤山招得老逋魂

白鶴歸來楚雲黑王孫歲晚客金華衣上緇塵深一尺
小姬未嫁怨東風夜夜高樓吹鐵笛

題墨梅卷子

元 成廷珪

千年老枝生鐵色雪魄冰魂誰貌得三生石上見逋仙
獨鶴歸來楚雲黑何郎垂老客揚州花前勸酒仍風流
江城吹笛月未落夢回一夜生春愁

墨梅

元 成廷珪

東閣衝寒雪一枝巡檐偏解索題詩何郎老去風情減

羞見疎花照鬢絲

墨梅

元 黃石翁

去年曾訪林君復
煙水蒼茫鶴未歸
不似對君橫小幅

一枝和雪照柴扉

題墨梅

二首

元 吳鎮

粲粲江南萬木妃
別來幾度見春歸
相逢京洛渾依舊
却恨緇塵染素衣

玉府仙姝倚澹妝
素衣一夕染玄霜
相逢不訝姿容別

為住王家墨沼傍

題墨梅圖

元 王冕

朔風吹寒冰作壘梅花枝上春如海清香散作天下春
草木無名藉光彩長林大谷月色新枝南枝北清無塵
廣平心事誰與論徒以鐵石磨乾坤歲晚燕山雲渺渺
居庸古北無人到白草黃沙羊馬羣瓊樓玉殿煙花繞
凡桃俗李爭芬芳只有老梅心自常貞姿燥燥眩冰玉
正色凜凜欺風霜轉身西冷隔煙霧欲問逋仙杳無所

夜深湖上酒船歸
長嘯一聲雙鶴舞

墨梅

元王冕

我家洗硯池邊樹
朵朵

一作箇箇

花開澹墨痕
不要人誇好

顏色只留清氣滿乾坤

題墨梅

三首

元劉永之

郭西茅屋經年別
嫩蕊疎枝入夢頻
何處幽尋重相憶
寒雲野水月如銀

茅屋蒼苔野水濱
歲寒冰雪久相親
江湖後夜扁舟夢

猶記尊前對玉人

仙館曾逢玉帶姿夢中要作曉寒詞於今相對情如水
惟有清霜繞鬢絲

墨梅

元倪瓚

幽蘭芳蕙相伯仲江梅山礬難弟兄室裏上人初定起
靜看明月寫敷榮

墨梅

元馬臻

疎葩結冷光素質凝古色濡毫誰氏子巧奪真宰力展

卷如有訴老兔向天泣髣髴月沈時影落參旗直夜久
書燈青鴻飛楚天黑寒香忽破鼻幽意不可得悠悠感
物理對此成太息我欲將贈遠真幻莫相識長嘯臨春
風春風浩無極

墨梅

元
蕭和

江邊春色歸何處長憶年年花發時愛殺南枝如許瘦
却愁羌管不勝吹

墨梅

元
張復亨

皎皎姑射姿寒香淡孤月歲落耿幽貞江空照竒絕何處碧參差吹落南枝雪因之託毫素夜半清輝發一洗京洛塵芳菲不堪折跼蹐坐消憂何待清尊竭

墨梅

元 錢惟善

小橋流水雪晴時曾折幽芳寄所思明月觀深春夢遠玉堂仙客寫橫枝

墨梅

元 趙孟堅

濃寫花枝淡寫梢鱗皴老幹墨微焦筆分三踢攢成瓣

珠暈一團工點椒糝綴蜂鬚凝笑靨穩拖鼠尾施長條
盡吹心側風初急猶把枝埋雪半消松竹襯時明掩映
水波浮處見飄飄黃昏時候朦朧月清淺溪山長短橋
鬧裏相挨如有意靜中背立見無聊筆端的厯明非畫
軸上縱橫不是描頓覺生成春盎盎因思行過雨瀟瀟
從頭總是楊家法拚下工夫豈一朝

題墨梅

元陶宗儀

華光三昧幻冰魂滿紙春風帶墨痕好似孤山亭子上

一枝斜映月黃昏

題畫墨梅

元 陶宗儀

明月孤山處士家
湖光寒浸玉橫斜
似將篆籀縱橫筆
鐵線圈成箇箇花

墨梅

元 張庸

玉顏不似向來真
猶自縈雲入夢頻
安得影娥池上水
為渠一一洗緇塵

墨梅

明 貝瓊

雪後尋梅恐未真
華光一日寫花神
廣寒玉兔分秋穎
剪斷羅浮萬樹春

墨梅

明徐賁

素質卻嫌脂粉蛾
眉淡掃玄霜翰
墨玉堂曾侍硯池
猶染餘香

題墨梅

明練子寧

姑射仙人玉佩環
瓊簫和月上青鸞
素衣不受緇塵染
留與江南歲晏看

題墨梅

明丘濬

老龍半夜飛下天
蜿蜒斜立瑤階裏
玉鱗萬點一齊開
凝雲不流月如水

題墨梅

明鄭真

先春遠寄墨淋漓
折得寒香第一枝
夢遶西湖山月暗
漆紗牕外影參差

墨梅

明李晔

烏不涅而黔鵲不浴而白
其類雖有殊各以見真色畫

師亦何心變幻隨世惑展圖對梅花為爾心惻惻

題墨梅贈楊稷

明金幼孜

素質比瑤瑰貞心不易摧江南春信早先寄一枝來

墨梅

明陳輝

每愛橫枝醉裏看滿林風雪浩漫漫數聲殘笛知何處
吹落空江片月寒

墨梅

明倪岳

歲華欲晏嚴冰霜山林萬木皆摧傷天意獨爾儲孤芳

根柯屈鐵何堅剛
冰花競發先春陽
傲睨六出紛迴翔
珠璣錯落生夜光
天風習習飄清香
姑射仙人整靚妝
鉛華淨洗曳素裳
江妃緩步鳴佩璫
縞袂輕舉聲鏗鏘
翠禽飛來月色涼
玉笛吹斷空徬徨
舉杯澆我鐵石腸
浩歌一曲天茫茫

題畫梅

元陳旅

處士橋邊古岸隈
梅花偏向小園開
衝寒有客尋春去
移得晴牕雪影來

題畫梅 三首

元 王冕

朔風撼破處士廬凍雲隔月天模糊無名草木混色界
廣平心事今何如梅花荒涼似無主好春不到江南土
羅浮山下蘼蕪煙瑤坡前荆棘雨相逢可惜年少多
競賞桃李誇豪奢老夫欲語不忍語對梅獨坐長咨嗟
昨夜天寒孤月黑蘆葉卷風吹不得鶻鶻夢老皮蒙茸
黃沙萬里無顏色老夫瀟灑歸巖阿自鉏白雪栽梅花
興酣拍手長嘯歌不問世上官如麻

君不見漢家功臣上麒麟氣貌豈是尋常人又不見唐
家諸將圖凌煙長劒大羽聯貂蟬龍章終匪塵俗狀虎
頭乃是封侯相我生山野無能為學劒學書空放蕩老
來晦迹巖穴居夢寐未形安可模昨日冷飈動髭須拄
杖下山聞鷓鴣烏巾半岸衣露肘忘機忽落丹青手器
識可同莘野夫孤高差擬磻溪叟山翁野老爭道真松
篁節操梅精神吟風笑月意自在只欠鹿豕來相親江
北江南競傳寫祝君歎其才盡下我來對面不識我何

者是真何者假祝君放筆一大笑不須攬鏡亦自小相
攜且買數斗酒坐對青山恣傾倒明朝酒醒呼鶴歸白
雲滿地芝草肥玉簫吹來雨霏霏琪花亂颭春風衣祝
君許我老更奇我老自覺頭垂一作如絲時與不時何以
為時與不時何以為贈君白雪梅花枝

江南十月天雨霜人間草木不敢芳獨有溪頭老梅樹
面皮如鐵生光芒朔風吹寒珠蕾裂十花萬花開白雪
彷彿蓬萊羣玉妃夜深下踏瑤臺月銀鑰泠泠動清韻

海煙不隔羅浮信相逢共說歲寒盟笑我飄流霜滿鬢
君家秋露白滿缸放懷飲我千百觴興酣脫帽恣磅礴
拍手大叫梅花王五更牕前博山冷么鳳飛鳴酒初醒
起來笑抱石丈人門外白雲三萬頃

題畫梅

元王冕

疎花粲粲照寒水瑪瑙坡前春獨回却憶去年風雪裏
吹簫曾棹酒船來

應教題梅

元王冕

刺刺北風吹倒人乾坤無處不沙塵胡兒凍死長城下
誰信江南別有春

題畫梅

元 貢性之

江南十月霜雪飄杖藜東郊復西郊酒酣不憚行路遙
踏遍第六西湖橋北風獵獵吹枯梢青天有鶴不可招
逋仙起舞來解嘲請君與我看此高堂素壁一幅之生
綃

畫梅

元 貢性之

月下獨吟時寒香暗襲衣直疑春信早蝴蝶作團飛

題梅

四首

元貢性之

平生心事許誰知不是梅花不賦詩
莫向西湖蹋殘雪東風多在向陽枝

第六橋頭雪乍晴杖藜曾引鶴同行
詩成酒力都消盡人與梅花一樣清

朔風撲面凍雲垂引鶴衝寒出郭遲
却憶西湖霜月下美人相伴立多時

江城鐘鼓夜迢迢
霜月多情照寂寥
更有梅花是知己
小牕斜度兩三梢

題畫梅送友人

元貢性之

折梅江上贈人行
此是東風第一程
從此不須憑驛使
看花直到豫章城

題畫梅

四首

元貢性之

濕雲壓地雪花乾
一日狂風十日寒
不管春光滿鄰屋
却從牆角借來看

美人別後動深思
春到南枝總未知
記取灞橋明月夜
忍寒花下立多時

羅浮山下著青鞋
蹋雪曾看爛漫開
好似人家茅屋底
一枝先占短牆來

十月江南正苦寒
花開如雪雪成團
如今老盡咸平樹
只寫前身畫裏看

題畫梅

明劉基

天桃能紫杏能紅
滿面塵埃怯晚風
爭似羅浮山礪底

一枝清冷月明中

畫梅

明方孝孺

微雪初消月半池
籬邊遙見兩三枝
清香傳得天心在
未許尋常草木知

畫梅

明牛諒

梨花雲底路參差
折得春風玉一枝
南雪未消江月曉
欲從何處寄相思

題畫梅

明朱經

疎煙小暈生瑤島仙鑑星明試妝早雲母屏風曉日寒
玉龍嘶天春不老憶昔相逢萼綠君別來珠珮留蒼雲
素鸞驚舞月破碎瓊臺歌斷音紛紛靈鏡解點玄霜汁
粉靨冰花照人濕返魂竟失篋中香翠羽悲啼聲轉急
紛吾欲下巫陽招楚騷遺恨湘川遙書憑鳳女雙飛翼
淚掩鮫妃一尺綃

畫梅

二首

明王誼

揚州詩閣掩芳塵萬萼千葩冷照春十里珠簾一聲笛

東風腸斷倚樓人

曾赴孤山處士招水煙寒淡月魂銷笛聲喚醒梨雲夢
記得東風倚畫橈

自題畫梅

明
金琮

一別西湖未得歸孤山風月近何如春來賸有看花興
又向君家寫折枝

題梅送友

明
徐章

萬樹籠香陣白雲孤山深處隔塵氛玉顏為惜君歸去

却向東風瘦幾分

題畫梅

明 許天錫

桐江野客半枯槁只有梅花與傾倒
塞驢破帽過南村不為梅花破煩惱
交情冷淡無人知怪我凌寒起常早
江頭臘月正月間雪裏十枝九枝好
自從作客向天涯萬里風煙跡如掃
是誰寫出斷腸魂坐對相思令人老
可憐兩度度春光不得香名入詩草
今朝試筆為君題清淚如絲灑玄昊

畫梅

明陳淳

風引上春香雪弄南枝色為有惜花心樓中莫吹笛

題畫梅

明秦旭

沙際春煙濕未消落梅風急送輕橈江邊有客尋詩去
應在西湖第六橋

題畫梅

明謝士元

羅浮仙子真崛奇天然標格冰霜姿歲寒心事老天識
調羹手段何人知以茲落魄孤山下弄月吟風足瀟灑

冥心靜裏悟乾坤自有香風抗蘭麝今日塵埃偶相逢
巡簷索笑聲瀾瀾相邀欲問徂徠子當年何事受秦封
江空歲晏路云邈且爾寄傲南牕中

題畫梅

二首

明徐渭

覓牛兩磔酒三卮索寫梅花四句詩想見元章愁米日
不知幾斗換冰枝

從來不見梅花譜信手拈來自有神不信試看千萬樹
東風吹著便成春

畫梅

明僧大遂

古榦橫斜意自奇
半開半蕊亦相宜
寒時悔不前村覓
知是溪橋第幾枝

畫梅

二首

明僧清遠

瑤臺夕承月玉砌
曉凝霜花映含章
發枝橫禁籞長春
風似相識偏惜壽陽妝

折得江南春悵望
洛陽客悠悠歲年暮
浩浩風塵隔遠道
勿相思相思減容色

御定歷代題畫詩類卷八十三

欽定四庫全書

御定歷代題畫詩類卷八十四目錄

花卉類

王伯敷所藏趙昌梅花

宋蘇軾

趙昌折枝

元袁楠

題華光為曾公卷作水邊梅

宋黃庭堅

觀華光長老仲仁墨梅

宋鄒浩

題華光墨梅

元王惲二首

題徽廟馬麟梅

元鄭東

題徽廟馬麟梅

元陳基

宋徽宗畫半開梅

明張迪

題王元章梅

元陳基

王元章梅

元鄭元祐二首

王元章白描梅

元鄭元祐

題王元章梅

元熊夢祥二首

題王元章梅

元張涅

題王元章梅

元丁復

題王元章畫梅

元楊維禎

題王元章梅

元于立

題王元章墨梅

元釋子賢

題王元章梅花圖

明劉基

王元章墨梅

明張羽

題王元章梅花和韻

明顧瑛

題王元章梅竹卷

明顧瑛

王元章倒枝梅畫

明徐渭

王元章作墨梅并題長句書其後

明陸完

題徐聖可知縣所藏楊補之二畫

宋樓鑰

補之畫梅

元程鉅夫

題楊補之梅卷

元高儀父

題楊補之梅

元劉詵

楊補之雪梅圖

明吳寬

題柯敬仲梅

元杜本

題柯敬仲梅花竹石圖

元郭翼

題柯博士梅竹圖

元鄭韶

柯丹丘梅竹

元倪瓚

題柯丹丘梅竹

明僧元璞

松雪墨梅

元鄧文原

題松雪墨梅

元錢惟善

趙子昂梅竹圖

明解縉

舜舉梅竹折枝

元程鉅夫

題錢舜舉畫梅

元戴子璋

題錢舜舉所畫梅花卷

明戴奎

題山農畫梅

元貢性之

王山農畫梅歌

明劉績二首

次韻題王山農墨梅

明文徵明

王山農畫梅

元唐肅三首

題畫梅和山農韻

明錢宰

胡侍郎所藏會稽王冕梅花圖

明僧來復

題王冕梅花揭蓬圖

明僧溥洽

趙子固畫梅

元吳師道

題趙子固墨梅

元陳旅

題徐太守所畫推蓬梅花圖

明李楨

題陳哲太守萬玉圖

明白所

題宋院人畫著苔梅

明劉績

江西李君千能能和墨及畫梅良齋許以三奇而

詩非所長也

宋樓鑰

贈畫梅王文顯

宋陸九淵

贈畫梅吳雪塢

宋謝枋得

贈黃竹邨老儒畫梅竹

元朱德潤

題梅石為王集虛尊師書紙屏上

元李孝先

題梅石卷贈蘇生

明王世貞

御定歷代題畫詩類卷八十四目錄

欽定四庫全書

御定歷代題畫詩類卷八十四

花卉類

王伯敷所藏趙昌梅花

宋蘇軾

南行度關山沙水清練練行人已愁絕日暮集微霰殷
勤小梅花彷彿吳姬面暗香隨我去回首驚千片至今
開畫圖老眼淒欲泣幽懷不可寫歸夢君家倩

趙昌折枝

元袁桷

瑤池朶朶玉精神
滴露研朱竟奪真
蛺蝶不知遮繡幕
飛來猶認故園春

題華光為曾公卷作水邊梅

宋 黃庭堅

梅蕊觸人意
冒寒開雪花
遙憐水風晚
片片點汀沙

觀華光長老仲仁墨梅

宋 鄒浩

我從梅花海裏來
驚此兩枝堂上開
不由天降非地出
道人作麼生栽培
無縫塔子通一線
放光照醒陳根荄
玉蟾銀漢雨初霽
半啓瓊室通瑤臺
香雲漠漠護顏色

世眼欲覩誠難哉不如取酒共春醉一杯一杯復一杯

題華光墨梅

二首

元王惲

滿溪明月影扶疎只在縑塵點雪膚展放畫圖還記得
孤山離落漲西湖

破墨能開雪裏芳道人花供老猶香移船要近華光住
笑殺涪公有底忙

題徽廟馬麟梅

元鄭東

龍樓鳳閣美人歌賞盡瓊花碧玉柯驛使去時渾浪折

江南春色已無多

題徽廟馬麟梅

元 陳基

內家春色少人知
玉蘂冰鞋看轉疑
說與宮中小兒女
畫樓瓊瑋莫輕吹

宋徽宗畫半開梅

明 張迪

上皇朝罷酒初酣
寫出梅花蕊半含
惆悵汴宮春去後
一枝流落到江南

題王元章梅

元 陳基

武陵溪上桃千樹亦有寒梅照水開一種春風標格在
太平恩澤為栽培

王元章梅

元
鄭元祐

明月西湖上清光儼舊時東風露消息香雪滿南枝

王元章梅

元
鄭元祐

孤山無復有梅花寂寞咸平處士家留得玉髯醉時筆
歲寒仍舊發枯槎

王元章白描梅

元
鄭元祐

王郎筆底無纖塵，只有萬斛江南春。
疎花冷蕊禁不得，珠明玉潤前森陳。
珊瑚交柯撐鐵網，金鉉鏤日張龍鱗。
咸平處士西湖濱，風雪滿頭肌肉皴。
長歌短吟梅樹下，聲詩寫得梅花真。
王郎晚載剡溪雪，艤舟孤山一問津。
色香原本闕塵盡奪取，高揮大抹駭世人。
舊時娟娟裏湖月，清光長照無疎親。

題王元章梅

元熊夢祥

紫禁春濃雪未消，年年香冷只飄颻。
許身入畫酬清賞，

不嫁東風過小橋

題王元章畫梅花

元熊夢祥

水影晴光為寫神當時已是失天真
一從殘角吹新曲幾向寒溪覓故人
縞袂歸來猶有月佩環飛去更無塵
莫言醉魄空籬落信把和羹屬大臣

題王元章梅

元張渥

照水疎花冰有暈橫牕瘦影玉無痕
孤山月冷黃昏後拄杖曾敲處士門

題王元章梅

元 丁復

三年不見王徵士一見梅花如見人
風致山陰頻夢夜雪晴江上又逢春
毫端只作尋常寫意度真同造化神
聞道耶溪新買宅想栽千樹作比鄰

題王元章畫梅

元 楊維禎

舊時月色有誰歌拔劍王郎鬢已皤
惆悵東風舊詞筆南枝香少北枝多

題王元章梅

元 于立

老鶴歸來不受呼野橋江樹雪模糊西湖處處皆桃李
省識春風到畫圖

題王元章墨梅

元
釋子賢

我家繞屋梅花樹況在清溪白石邊雲霄月明疎影小
讀書猶記十年前

題王元章梅花圖

明
劉基

會稽老王拙且癡能畫梅花稱絕奇春牕走筆生古怪
中有窈窕傾城姿人生得閒真是好得閒不閒惟此老

布袍鬪茸髮不梳一生只被梅花惱天生梅實可和羹
爾梅有花結不成世間花實總尤物不如圖畫終古無
枯榮

王元章墨梅

明
張羽

王郎志奇貌亦奇與世落落嗟莫施一朝騎牛入都市
關吏不識誰何之歸來老作會稽客干戈歟然西南陲
青袍白馬風塵裏越州城邊戰不已雄襟自許魯仲連
一箭無成身已死世上空餘寫墨花只將名姓華光比

嗚呼人生有才不盡用古來埋沒皆如此

題王元章梅花和韻

明顧璘

墨池五夜飛玄霜素靈幻出梅花芳草堂忽爾見春色
氣序不得由勾芒空山慘凜層崖裂千枝萬枝綴瓊雪
水晶屏風疎影寒舉頭却見黃昏月江笛橫飄黃鶴韻
遷人莫報長沙信欲取寒芳寄遠書轉愁旅思催蓬鬢
簾外清香撲酒缸千金莫惜日飛觴解道明珠交玉體
風流獨羨陳思王狐裘蒙茸不知冷醉臥花前不須醒

夢來直上羅浮巔占却梅花千萬頃

題王元章梅竹卷

次祝鳴和

明顧璘

畫家妙品古亦稀高人每號無聲詩淺夫拈筆率信意
豈解盤礴凝深思聊希形似即滿意難與神化論等差
子喬老仙煙霞骨刷出心肝洗塵俗身化西湖一樹冰
氣吞湘岸千竿玉映縑姿態鬬纖穠轉手枝柯分直曲
山空自喜野人同歲寒敢謂吾曹獨補之墨梅稱絕倫
與可寫竹恒逼真今之畫圖兼二妙始信苦學能通神

草堂六月氣淒爽彷彿坐我清江濱白頭豈知老將至
對爾真足忘冬春憶昔青陽迴綠草橫斜桃李長安道
一夜飄風歷亂生可憐花葉紛顛倒塵世繁華有盛衰
朱門一閉無人埽與君開卷玩高標絕勝對客談虛藻
莫怪梅花著地垂

王元章倒枝梅畫

明徐渭

皓態孤芳壓俗姿不堪復寫拂雲枝從來萬事嫌高格
王元章作墨梅并題長句書其後

明陸完

月落參橫興已空
鑑湖清淺夜推蓬
消磨不盡惟豪氣
猶在疎花淡墨中

題徐聖可知縣所藏楊補之二畫

宋樓 鑰

誰種疎籬古岸頭
推蓬瞥見倍清幽
君看竹外一枝好
真有江南萬斛愁

梅花屢見筆如神
松竹寧知更逼真
百卉千花皆面友
歲寒祇見此三人

補之畫梅

元 程鉅夫

開卷見橫枝逃禪不可期忽思霜月夜獨坐小牕時

題楊補之梅卷

元 高儀父

籬根玉瘦兩三枝為繞吟香夜不歸安得密林千畝月
仰眠吹笛看花飛

題楊補之梅

元 劉詵

補之之梅不易作况乃藏自澹翁閣澹翁千載忠補之
一世雄元氣擘裂乾坤冬開卷灑然見二公孤山之月
羅浮風淡雲萬古吹不融黑埃黯慘翠羽失小牕澹養

重湖東塵心蕭蕭淡若水臥看青天露如洗

楊補之雪梅圖

明 吳寬

竹外斜枝凍雪乾楊翁風度亦酸寒扁舟穩繫吳山麓
須向石湖深處看

題柯敬仲梅

元 杜本

點點苔枝綴玉疎疎檀蕊凝香還記當年月色簫聲暗
度宮牆

題柯敬仲梅花竹石圖

元 郭翼

夜寒起坐看龍影金閣罨
小殿東夢覺香吹梅子樹
玉文堂上月方中

題柯博士梅竹圖

元 鄭 韶

丈皇宴罷奎章閣博士歸來兩鬢絲
寫得寒梅與脩竹
照人清影尚參差

柯丹丘梅竹

元 倪 瓚

竹裏梅花淡泊香映空
流水斷人腸
春風夜月無蹤跡
化鶴誰教返故鄉

題柯丹丘梅竹

明僧元璞

丹丘歸老江南日每話奎章瀑直時一夜春寒愁漠漠
白雲蒼雪共襟期

松雪墨梅

元鄧文原

憶昔衝寒踏雪時百花零落願開遲如今收拾橫書卷
一任無情塞管吹

題松雪墨梅

元錢惟善

小橋流水雪晴時曾折幽芳寄所思明月觀深春夢遠

玉堂仙客寫橫枝

趙子昂梅竹圖

明解縉

王孫襟懷絕塵俗，迴若簞簞在空谷。又如仙子下羅浮，
雪月梅花冰映玉。時將翰墨自寫真，心手相忘道機熟。
流傳後世作者稀，丹青采繪工絕奇。寒聲夜讀暗香起，
妙畫通神那得知。

舜舉梅竹折枝

元程鉅夫

吳興畫手早相知，粉墨淒涼歲月移。惟有寒梅并翠竹，

京華相對獨題詩

題錢舜舉畫梅

元戴子璋

故人相憶對南枝
寫寄無煩驛使持
此日披圖空想像
猶疑月落酒醒時

題錢舜舉所畫梅花卷

明戴奎

雪溪畫師名早傳
畫梅不作鐵綫圈
湖山入夢既瀟灑
粉繪落紙尤清妍
巴西故人玉堂老
別去幾年音問少
溪雲山月不堪持
一枝寫寄春風早
想當槃礴欲寫時

寓情筆底誰能知心期不負歲寒意貞潔要如冰雪姿
到今令人歎奇絕我亦見之慚蹇拙從誰交誼重金蘭
空慕廣平心似鐵

題山農畫梅

元
貢性之

大庾嶺頭春信早十月梅開照青昊曾騎官馬隴頭來
百里梅花夾馳道夫君元是嶺南人自言家近羅浮邨
種梅遶屋一萬樹玉為肌骨冰為魂得官遠向西湖住
喜與林逋作賓主夢回酒醒霜月寒又見梅花在牕戶

笑倩旁人為寫真相看如見嶺頭春一聲長笛月欲落
腸斷梅花身後身

王山農畫梅歌

二首

明劉績

玄冥凍律凝陰谷山魃幽幽弔僵木誰卷鮫機一尺煙
昆刀碎刻藍田玉博羅山人調小鳳瓦冷霜華不成夢
火熏金獸蘭氣溫鎖牕斜月淡幽痕

水仙騎龍歸海宮玫瑰珠珮迎春風霧澄天淨露嬌影
蕊粉染衣香更濃鮫綃隔夢梨雲色么鳳不鳴花脉脉

畫角吹殘十二樓湖西曉月涵空白

次韻題王山農墨梅

明 文徵明

西湖老樹凌風霜數英奕奕先羣芳貞姿不作兒女態
炯然冰玉生寒芒窮寒襲人膚欲裂幽人自詠孤山雪
至今秀句落人間暗香浮動黃昏月却恨無人續高韻
墨痕聊寄江南信不關素質暗緇塵剛愛鉛煤點新鬚
恍疑寒影照昏缸刻畫無鹽誰濫觴逃禪已遠嗣者寡
彷彿尚記山農王山農何處骨已冷展卷令人雙目醒

何因為喚玉妃魂極目清波湖萬頃

王山農畫梅

三首

元唐肅

春回却月觀樹樹總花開無數
瑤臺鶴凌風欲下來
溪上雪消初溪冰未動魚一枝
寒日裏照見影疎疎
憶上寶瓶船西湖欲雪天一枝
歌岸出低照酒尊前

題畫梅和山農韻

明錢宰

江南春來白雪爛落月橫參夜將半
縞衣綽約如故人
颯沓梨雲歌老榦北風獵獵天正寒
彷彿風節凭西闌

迺知山人竟不死夜煮白石青松間高情抗世無今昔
溪上梅花沒荒棘憶曾揮翰灑溪雲一枝寄與春消息
花前喚酒寫長歌花下呼兒掃落花若非揚州何遜宅
定是西湖處士家山人愛梅心獨苦笑爾豪吟玉堂樹
山巔水際日看花鳳詔鸞書招不去解衣槃礴兩袖垂
腕指所至皆天機南枝著花玉色起北枝凍壓玄霜飛
自從上苑成塵土無復當年舊歌舞源上桃花不記秦
九畹芳蘭已忘楚不如山人臥雲松破屋長在梅花東

傳家有子花作譜放手直欲先春風見花如見山人面
誰道人間無是公

胡侍郎所藏會稽王冕梅花圖

明

僧來復

會稽王冕雙頰顰愛梅自號梅花仙興來寫遍羅浮雪
千樹脫巾大叫成花顛有時百金閒買東山屐有時一
壺獨酌西湖船暮校梅花譜朝誦梅花篇水邊籬落見
孤韻恍然悟得華光禪我昔識公蓬萊古城下臥雲草
閣秋瀟灑短衣迎客懶梳頭只把梅花索高價不數楊

補之每評湯叔雅筆精妙奪造化神坐使良工盡驚詫
平生放蕩禮法疎開口每欲談孫吳一日騎牛入燕市
瞋目怪殺黃髯胡地老天荒公已死留得清名傳畫史
南宮侍郎鐵石腸愛公梅花入骨髓示我萬玉圖繁花
爛無比香度禹陵風影落鏡湖水開圖看花良可吁咸
平樹老無遺株詩魂有些招不返高風誰起孤山逋

題王冕梅花揭篷圖

明
僧溥洽

王郎寫梅如寫神天機到手驚絕倫自言臨池得家法

開縑散作江南春酒酣豪叫呼霜繞寶泓倒飲隄廉熏
龍跳虎臥意捷出縱橫錯漠迷芳塵繁花不消千樹雪
古苔蝕盡樛枝鐵縞衣綽約珮璫明夜夜貞心照寒月
嗟予落魄西湖濱夢魂幾度入梨雲東風吹香趁流水
斷橋愁送波沄沄一杯不到孤山土忽見王郎已千古
還君此圖歌莫哀原草青青隔煙雨

趙子固畫梅

元
吳師道

千樹西湖浸碧漪醉拈玉笛繞花吹祇今無限淒涼意

留得春風雪一枝

題趙子固墨梅

元
陳旅

王孫朝罷景陽宮
畫舫湖頭寫雪風
一段寒香留不住
淒涼殘月角聲中

題徐太守所畫推蓬梅花圖

明
李楨

紛紛卉木凋零早
獨有江梅冬更好
天寒歲晏風泠泠
野渡無人流斷冰
南枝爛漫北枝少
恍如玉貌千娉婷
自憐隨月印沙影
更愛臨崖近水形
當塗太守今黃霸

名重華光補之亞酒酣自寫復自題餘子持縑終不畫
半開盛吐俱含態將飄乍落皆有情玲瓏輕霰簇鏤玉
蕩漾明珠疊碎瓊昨來盧君新卷裏寫得長梢最妍美
疎蕊凌寒似得春暗香撲鼻疑生紙世間畫手多凡流
惟數徐君筆最優不必掀篷棹飛雪觀圖何異在扁舟

題陳哲太守萬玉圖

明
白圻

玄冥一出百卉摧凍天裂地施寒威西湖老樹含春姿
鮮葩皎月爭光輝清香暗從風外來怯寒蜂蝶空疑猜

結實垂金飽霖雨調羹止渴非凡材孤山仙子詩興濃
厭看桃李嬌春風衝寒折雪攪芳潔豪吟意氣凌蒼空
十載論交良燕喜此日分襟隔湘水明歲仍期折一枝
寄與衡陽舊知己

題宋院人畫著苔梅

明劉績

濃露洗花骨苑空勞勞春綠罽疊仙帔粉姿疑笑人畫
屏宵幽夢夜苦香不歇楚竹裂鳳膺恨魄如懸玦

江西李君千能能和墨及畫梅良齋許以三奇而

詩非所長也

宋樓鑰

游藝無小大要皆知本原後人率意作終當愧前賢老
潘妙對膠法從玉局傳或假季心名空掃千鎗煙補之
貌梅花疎瘦仍清妍竹枝映月影真態得之天李君信
雅尚二者將求全諸公競稱許試之乃仍然江西有詩
派皎皎俱成篇茲事未易窺屬和尚加鞭

贈畫梅王文顯

宋陸九淵

子作寒梢已逼真不須向上更稱神由來絕藝知音少

只恐今人過古人

贈畫梅吳雪塢

宋謝枋得

冷凝寒極雪漫漫天下無人知袁安起來門前問梅竹
吾友可以話歲寒歲寒心腸如鐵石不與萬物同摧殘
有時醉中畫梅竹洪鈞只在掌握間人生莫與天爭巧
上帝一見開笑顏八極俗物不足道千年陳人無可觀
誰能奈得此雪過春風去後終須還千紅萬紫爭爛漫
梅竹攜手隱空山臯陶庭堅不祀苦程嬰杵臼存孤難

豈無當門獨立者五更風雪不相干上帝慈仁須動念
醒來紅日上三竿

贈黃竹村老儒畫梅竹

元朱德潤

煙水盱江渺丹陽度雪寒久憐梅淡泊先問竹平安夜
月清詩思春風彩筆端北來知己少歲暮欲彈冠

題梅石為王集虛尊師書紙屏上


元李孝光

北風吹倒山三日雪塞門悵悵巖谷裏萬木命在根天
翁粲然笑洗出明月魂春如鼎中香已覺火力溫

題梅石卷贈蘇生

明
王世貞

君今幽興何所寄
日坐磐石梅花傍
一峰兩峰洞庭古
千樹萬樹羅浮香
平泉莊畔酒初醒
却月觀前人欲狂
何似儂家新塢就
不須遙羨白雲鄉



御定歷代題畫詩類卷八十四

欽定四庫全書

集部

御定歷代題畫詩類卷八十五至
七

詳校官侍郎_臣李 封

主事銜_臣徐以坤覆勘

總校官降調編修_臣倉聖脉

校對官編修_臣吳錫麒

謄錄監生_臣黃恒謙

欽定四庫全書

御定歷代題畫詩類卷八十五目錄

花卉類

仁老寄墨梅 宋鄒浩七首

和張矩臣水墨梅 宋陳與義五首

次韻何文縝題顏持約畫水墨梅花 宋陳與義二首

題徐參議墨梅畫軸 宋王炎

題隆上人墨梅花

宋孫覲

題剡溪瑩上人梅花小軸

宋陸游

題趙晞遠墨梅

宋樓鑰

三峰康道人墨梅

宋朱松三首

妙高梅花

宋張栻

光上人送墨梅來求詩還鄉

宋張栻

題劉文簡所藏墨梅卷

宋劉宰

祕書張監墨梅圖

金李濟

宋漢臣墨梅元劉秉忠

題趙雲趣梅圖元程鉅夫

墨梅寄因上人元宋元二首

戲題僧惟堯墨梅元趙孟頫

題詹圃老梅圖元虞集

題王南谷大夫自作墨梅元黃潛

錙山立梅圖元歐陽玄

所貴姪梅元歐陽玄

題朱生質夫所藏梅花圖元貢師泰

寄東山寺長老宅區中索畫梅元張昱

題吳照磨墨梅元納延

題墨梅元納延

題汪伯高梅元丁復

題古學士墨梅元杜本

贈雲峰上人墨梅圖元王冕

題張鍊師所藏畫梅元陳基

徐仲晦作書惠水墨梅圖
元周權

潘易齋寫水墨梅
元周權

恢上人墨梅
元華幼武

題族兄馬子英進士梅花
元丁鶴年

題梅花卷
元張天英

梅花圖
明汪廣洋

題道上人墨梅
明高啓

到山西題畫梅
明楊基

題墨梅

明王褒

題陸二闔墨梅

明管訥

題李璋梅花

明鄭真

題已上人墨梅

明鄭洪

墨梅

明高遜志

題邢克寬太守梅花

明岳正

題顧御史所藏梅花圖

明倪敬

梅花小幅

明姚綸

題陸廉伯庶子所藏墨梅

明程敏政

題屈都諫引之墨梅

明傅珪

題焦中書梅卷

明林瀚

胡冬官梅花圖

明邵珪

題趙行恕參議所寄沈徵士墨梅

明吳寬

為寧縣令蕭光甫題墨梅

明吳寬

為陳明之題墨梅

明吳寬

為顧良弼題墨梅

明吳寬

曾仲仁墨梅

明周用

古峰畫梅歌

明何景明

題林自怡墨梅

明羅泰

題鄭時暉繡衣畫梅

明蕭顯

題徐嘉興扇畫梅

明謝廷選

題余千兵梅花圖

明林景清

梅花圖

明吳宣

梅花春意圖

明廖道南

梅花卷

明廖道南

題畫梅

明王世貞

題談思重寫梅花

明王世貞

雙梅歌

明王世貞

題梅卷

明王世貞二首

雪湖老人墨梅

明焦竑

御定歷代題畫詩類卷八十五目錄

欽定四庫全書

御定歷代題畫詩類卷八十五

花卉類

仁老寄墨梅

七首

宋

鄒浩

二月八日春氣分忽見梅英枝上繁顛狂索酒醉復醒
知是筆端回化元

嶺南消息報來新正想梅花傍酒尊生出兩枝遙寄我
道人方便信多門

前年謫向新州去嶺上寒梅正作花今日霜縑玩標格
宛然風外數枝斜

馬祖菴頭挂鉢囊晚隨緣出住華光僧繇一筆無人會
戲作寒梅自在芳

解衣磅礴寫梅真一段風流墨外新依約江南山谷裏
淡煙疎雨見精神

金張許史競東風魏紫姚黃醉眼中賓客貴人吾不與
獨將清韻照禪宮

春晚晴光破雨回
閒將花軸傍簷開
爐煙細逐輕風散
疑是香從梅處來

和張矩臣水墨梅

五首

宋 陳與義

巧畫無鹽醜不除此
花風韻更清殊從教
變白能為黑
桃李依然是僕奴

病眼昏花已數年
只應梅蕊故依然
誰教也作陳玄面
眼亂初逢未敢憐

粲粲江南萬玉妃
別來幾度見春歸
相逢京洛渾依舊

唯恨緇塵染素衣

含章簷下春風面造化功成秋兔毫意足不求顏色似
前身相馬九方臯

自讀西湖處士詩年年臨水看幽姿晴牕畫出橫斜影
絕勝前村夜雪時

次韻何丈纘題顏持約畫水墨梅花

二首

宋
陳與義

牕前光景晚來新半幅溪藤萬里春從此不貪江路好

賸拋心力喚真真

奪得斜枝不放歸倚牕承月看熹微墨池雪嶺春俱好
付與詩人說是非

題徐參議墨梅畫軸

宋

王炎

酷似西湖處士詩雖無半樹有橫枝天寒地冷清臞甚
故著緇衣護玉肌

題隆上人墨梅花

宋

孫覲

一枝插向釵頭見千樹開時雪裏看慚愧通神三昧手

盡將春色寄毫端

題剡溪瑩上人梅花小軸

宋 陸游

孤舟清曉下溪灘
為訪梅花不怕寒
忽有一枝橫竹外
醉中推起短篷看

題趙晞遠墨梅

宋 樓鑰

牕前驚見一枝斜
照眼英英十數花
千載簡齋仙去後
何人更著好詩誇

三峰康道人墨梅

三首

宋 朱松

一枝春曉破霜煙影寫清波最可憐
衲被犯寒歸吮墨也知無地著朱鉛

冰盤青子渴爭嘗怪有橫枝著意芳
等是毫端幻三昧更煩覓句爲摹香

緗囊墨本入宣和林下霜晨手自呵
不學霜臺要全樹動人春色一枝多

康畫嘗投進又為朱
勳畫全樹帳極精

妙高梅花

宋張栻

戲折寒梅畫裏傳便知香爨攪佳眠
愛君花木逡巡有

乾笑春風入暮年

光上人送墨梅來求詩還鄉

宋 張 栻

南岳有雲留不住東歸結伴過湘湄
解將疎影橫斜句來換垂珠的鑠詩
矧甚爲肩寒入畫清於鶴骨老難醫
遙知入嶺風煙暮正及追胥餽歲時

題劉文簡所藏墨梅卷

宋 劉 宰

煙雨和成宛擅場新來翻著雪衣裳
以吾不可學渠可善學楊君秭此郎

祕書張監墨梅圖

金李 澥

眼中只有梅千樹不挂世間蜂蝶花十載江南春夢斷
至今清影在君家

宋漢臣墨梅

元劉秉忠

體盡江村雅淡情映來紙上照人清枝梢欲向風中動
根幹原從筆下生幾簇芳英雪妝點一彎新月玉斜橫
華光不死西湖見也索驚嗟問姓名

題趙雲趣梅圖

元程鉅夫

燭龍一步九徘徊
便恐昆明燼作灰
避暑雪樓無去處
天留半樹補之梅

墨梅寄因上人

二首

元 宋 无

寒枝香在天外疎
花影流水中犁雲
夜深清夢草玄筆
底春風

夢覺霜林墮月眼
明野水浮枝橫玉
不吹春去斷縑間
寫相思

戲題僧惟堯墨梅

元 趙孟頫

瀟灑孤山半樹春素衣誰遣化緇塵何如淡月微雲夜
照影西湖自寫真

題詹圃老梅圖

元虞集

鄉人共識古梅樹移植詹亭仍百年計時當生宣政前
僻遠幸遺花石船昔僑寶唐尋故物石樓嵯峨白沙白
陵陽慈竹樂公移根節相扶俱遠客此樹乃在鄰邑間
看花食實真足閒人言支離故多壽我意培植茲惟艱
華蓋高人世師表為爾賦詩歌窈窕詹家孫子多讀書

早晚春雷化龍矯

題王南谷大夫自作墨梅

送府君時
教授南歸

黃潛

何遜揚州跡未陳
染衣不是洛城塵
毫端一綫陽和力
中有江南萬斛春

錙山立梅圖

元
歐陽玄

山澤臞儒面目真
見梅往往見先人
屋梁月色新湔拂
茅舍玉堂同一春

所貴姪梅

元
歐陽玄

老樹縱橫出氣條一枝還入亞牆腰西湖湖上掀篷看
一夜吹香滿六橋

題朱生質夫所藏梅花圖

元
貢師泰

水晶簾幙珊瑚鉤萬玉花間一鏡秋睡起瀟湘寒凜烈
却疑飛雪在羅浮

寄東山寺長老宅區中索畫梅

元
張昱

同是多生無垢身孤芳歲晏轉精神濡毫應覺香先到
寫影無如月最真庾嶺近來還有信華光以後更何人

情知此事難描畫驛使空回可不嗔

題吳照磨墨梅

元納延

天台吳架閣京下憶尋梅倚杖月中立思君江上來夜深憐雪落香動覺春迴獨坐溪邊石煙雲滿綠苔

題墨梅

贈徐用吉南歸

元納延

蘓公隄上路千樹雪紛紛載酒曾邀我看花每憶君翠陰松下臥鐵笛月中聞獨有思歸者長歌望白雲

題汪伯高梅

元丁復

兔白寒霜染雪毫綠烟微散月初高野人醉醒羅浮夢
長憶仙娥玉色醪

題吉學士墨梅

元 杜本

冰雪肌膚鐵石腸翩翩和月按霓裳臨牕喜見橫斜影
却有王孫翰墨香

贈雲峰上人墨梅圖

元 王冕

粲粲疎花照水開不知春意幾時回嫩雲清曉孤山路
記得短筇尋句來

題張鍊師所藏畫梅

元陳基

幻藥能招水月魂，蓬萊宮殿集靈芬。
誰將處士明珠珮，獨贈仙人萼綠君。
海國有香飄艾納，洞天無夢化梨雲。
春風想見瑤池會，瀟灑真妃玉作羣。

徐仲晦作書惠水墨梅圖

有和靖題紀歲月絹素索
敗餘字不存作詩歸之

元周權

溪藤擣霜寒奪目，硬黃瘦字疎相續。
墨花出袖吐春妍，一片玲瓏水蒼玉。
分明寄我孤山圖，上有歲月書林逋。

古丹漫漫篆窠暗敗素颺颺形神枯西泠橋畔黃昏景
船頭鶴夢風吹醒一從馬鬣鎖荒寒萬古人間幾香影
苦吟老盡詩壇豪窮愁到我心徒勞還君此畫三太息
雪晴月映橫牕梢

潘易齋寫水墨梅

元
周權

胸中一卷義周易筆底萬斛江南春莫向冰紈寫孤潔
從他水月自傳神

恢上人墨梅

元
華幼武

冰姿玉質本天真幻化移來物外春可是道人嫌太潔
從教素服染緇塵

題族兄馬子英進士梅花

元

丁鶴年

池館春深看牡丹五陵車馬隘長安誰知凜凜冰霜際
却是梅花守歲寒

題梅花卷

元

張天英

此花正如黃叔度不見令人鄙吝生谷底歲寒誰邀得
白駒散側晚烟明

梅花圖

明 汪廣洋

贛江去國數千里曾對梅花憶故人
今日歸來看圖畫一枝寒玉更精神

題道上人墨梅

明 高啓

笛裏寒梢蕊自開幾年風雨不生苔
山牕夜半禪初定應喜無香觸鼻來

到山西題畫梅

明 楊基

江南分手到山西每憶溪橋夢不迷
冰雪有如林下約

一枝重向畫中題

題墨梅

贈蘓
上舍

明
王褒

翠屏山水雲香別墅歸來月在牀
今日看圖詩興動
渾如東閣送何郎

題陸二闔墨梅

明
管訥

青禽枝上月如霜
夢覺羅浮欲斷腸
却憶故園池館裏
看花一月不燒香

題李璋梅花

明
鄭真

三年為客海東崖
萬里羅浮一夢賒
霜月夜寒天地白
開門曾憶看梅花

題已上人墨梅

明 鄭洪

故園梅樹三年別
長憶看花溪雪晴
巧出疎籬便蕭散
近遭碧水更分明
揚州何遜足詩興
茅屋已公無俗情
畫圖忽見轉愁絕
遙想月華枝上生

墨梅 為李鍊師賦

明 高遜志

誰向隴頭來寄此
一枝雪莫負歲寒盟
道人心似鐵

題邢克寬太守梅花

明 岳 正

美人家住古羅浮，鐵石肝腸不解愁。
羌笛一聲清夢破，也隨春色到蘓州。

題顧御史所藏梅花圖

明 倪 敬

我家遠在吳山住，路入梅花最深處。
天香歲晚雪紛飛，繞屋寒香千萬樹。
花時日日醉花邊，酒醒長吟花下眠。
聽到翠禽啼斷處，任教明月照青天。
自從游宦京華久，夢繞花前與花後。
故鄉花發想依然，何遜才華已非舊。

霜臺御史繡衣人，藏得橫斜水影真。
一幅齊紈裁皎潔，筆端渾是玉精神。
蕭蕭凍雨簷花落，紙帳夜寒燈影薄。
恍然相對似還家，春信依稀生綠萼。
綠萼春生日漸多，山中歸興尚蹉跎。
玉堂日賜宮壺酒，其柰梅花似雪何。
何當催赴看花約，莫待江天吹曉角。
詩成起向畫中題，酒熟還思花下酌。

梅花小幅

明姚綸

貧看璧月挂梢頭，幾次花前倚醉遊。
無奈翠禽啼處苦，

不容清夢到羅浮

題陸廉伯庶子所藏墨梅

明

程敏政

宋人寫梅工染地染出疎花得花意寒枝點綴縱復橫
宛在江村立烟際元人寫梅鐵作圈千玉萬玉相聯拳
天機淺深各有態三昧定屬何人傳忽拭此圖真宋手
入眼丹青未能有涼風未覺生衣襟古月猶疑照牕牖
斷縑殘墨驚海棠當時價抵千金強幾人豪奪幾懸購
完璧乃歸君子堂多君家在毘陵住高潔平生似梅樹

秀餐亭上歲寒盟時約花神共來去我今歸臥新安山
暗香正繞清溪灣北河冰堅未成往春夢夜落松筠間
補之不作林逋老紅綠紛紛競妍好愧無佳句慰幽芳
三復莓苔被花惱

題屈都諫引之墨梅

明 傅 珪

誰拈彩筆向西湖貌取寒梅入畫圖為愛清香兼晚節
幾人相對撚吟鬚

題焦中書梅卷

明 林 瀚

一曲霜風玉笛寒
枝南枝北半闌珊
珠鈿落盡香猶在
莫作春堤柳絮看

胡冬官梅花圖

明

邵珪

江南江北霏霏雨
漁榜漁罾短短籬
斜出一枝青鳥外
東風掩映水仙祠

題趙行恕參議所寄沈徵士墨梅

明

吳寬

不見王孫知幾年
更堪東老入重泉
江南風景渾如舊
春草梅花共悵然

為寧縣令蕭光甫題墨梅

明
吳寬

老幹彎欹新幹直總是昆吾鑕鐵色枝頭忽被北風吹
迸出疎花成戲劇薄如蟬翼細蝶鬚敢與臘雪偏相敵
雪也無香復易消阻山背水俱無策花神冷笑不言功
月下脩脩倚蒼壁狂遊不到綺陌間小隱時當野橋側
平生高韻有誰知此種竒姿何處得補之已逝叔雅亡
人間久矣無清蹟詩人未補白華詩畫家重倒金壺墨
悠悠此意我所諳欲向蕭侯聊比德試看寧縣九年官

篋裏只餘花的的士林傳玩等甘棠黃鶴樓中莫吹笛

爲陳明之題墨梅

明

吳寬

溪藤百尺餘慘慘顏色變遂令塵埃中難識冰雪面秋
陽射疎牕晨起偶開卷妙手非補之歷歷花可辨橫柯
欒且枯老幹直不顫天寒北風高滿眼集玄霰

爲顧良弼題墨梅

明

吳寬

芳名曾向譜中傳似見臨溪影倒懸爲語遊人休亂折
低枝正與雪霜便

曾仲仁墨梅

明周用

自憐官閣少詩流
春信相將寄隴頭
一種孤牕明月夜
直飛清夢到衡州

古峰畫梅歌

明何景明

空江月墮孤山曉
直榦橫枝疎更好
夜來夢破碧牕虛
殘雪半庭寒不掃
小橋水淺影初斜
野徑風清香未老
霜魂月魄獨娉婷
玉骨冰肌自枯槁
溪頭數點瘦花明
塢雲漠漠林煙渺
逋翁湖山詩思閒
寂寂柴門春醉倒

山亭晝午鶴飛還一聲長笛江門悄

題林自怡墨梅

明 羅泰

闕下簪紳裔幽居寂不譁穿雲開竹逕繞屋種梅花東
閣吟仙宅西湖隱士家傾心同潦倒古貌復槎枒春信
傳芳萼寒光積素華露含珠蓓蕾雪綻玉交加斗帳空
香遠書幃片影斜終當調鼎鼐未許託兼葭臥對宮簷下
行尋灞水涯妝成誰復見詩在世仍誇驛路愁難寄羅
浮夢轉賒天風吹酒醒涼月上牕紗

題鄭時暉繡衣畫梅

和張東海
武選韻

明
蕭顯

清夜珊珊響珮瑤羅浮夢斷酒初消美人何處遊仙去
獨有遺容傍野橋

題徐嘉興扇畫梅

廣屠大
理韻

明
謝廷選

羌笛悲殘曲含章憶素英關情使君閣詩雪夜同清

題余千兵梅花圖

明
林景清

將門豪客城東住手植梅花三五樹爲愛寒香戶正開
坐對梅花日成趣風流太守爲寫真老手筆精妙入神

半幅溪藤奪造化枝南枝北爭先春花如綴玉柯如鐵
標格由來自高潔髣髴西湖起朔風滿林瓊樹飄晴雪
豪客幽情誰得知對花看畫兩相宜昨朝留我花下酌
濡毫索取題新詩

梅花圖

明

吳宣

野韻寥寥起太清溥天容易對誰鳴餘尋萬古無痕月
聽奏冰絃一再行

梅花春意圖

為張梅江
太守賦

明

廖道南

君不見上林苑中誇紫蒂梅開玉塢真佳麗烟染龍池
護影斜雪消鯨島連枝霽又不見艮嶽堂前稱綠萼梅
開瑤圃殊蕭索靈根屈曲穿西垣勁質幽奇傍東閣何
如八閩山中梅萬株梅開江上水縈紆蓀壁全留春意
早葯房半繞月華孤竭來射策明光殿夜神入夢疑相
見鵲鵲盈盈玉笋輝蓬萊裊裊金蓮炫高韻還登大雅
堂渾如大庾嶺頭香曳裾長襲幽蘭秀珥筆仍含杜
若芳邇乘五馬來三楚阜葢朱旂臨鄂渚鸚洲瓊藻王

孫賦鶴樓鐵笛仙人語天回北陸向嚴冬江上寒雲盡
日封壯節獨憐君子竹孤忠恒對大夫松姑射清姿在
何處朝光浮動扶桑曙淡魄奚論何遜齋暗香不羨陰
鏗署我時漫和東坡詞松風亭外鬱相思商鼎試調元
氣轉炎經堪贊化工奇梅花圖中觀太始雞雛滿前皆
赤子願君布澤霑九陔坐使春風遍桃李

梅花卷

次東坡韻為
汪堯州題

明
廖道南

維山之麓水之村梅花有夢撩清魂孤芳迴敵白雪皎

苦節直破黃蘗昏我心愛梅如愛蓮地偏每憶君子園
夢澤寒光落空翠竟陵野色含春溫南枝屈盤海月照
東林炫赫朝陽燉未報王猷造竹所且延謝客歌松門
天地為鑪萬物炭噫嘻玄造渾無言還期結實薦商鼎
莫遣搖落悲芳尊

題畫梅

寄吳江趙令君季兆君廣平明人也宋廣平嘗賦之故云

王世貞

空庭一樹影橫斜玉瘦香寒領歲華解道廣平心似鐵
古來先已賦梅花

題談思重寫梅花

贈李茂水

明

王世貞

談郎寫梅今絕倫
貌得羅浮月下神
玉笛江城吹不落
一枝留伴謫仙人

雙梅歌

為方塘張封君賦

明

王世貞

瑤臺仙妹畏桃妒
化作君庭雙玉樹
大庾萬條看更俗
隴頭一闕吹不墮
張果齟齬如編銀
要與此樹爭丰神
飛觴三雅媚殘月
搖筆片語開新春
有子移根奉溫室
皎皎冰姿射霜日
莫言子作書生酸
要與君王調鼎實

題梅卷

贈虛上人二首

明

王世貞

羅浮寒玉千樹折贈闍黎一枝欲識西來真意暗風吹

到軍持

隴頭玉笛吹遍哀響不到僧家為問阿師微笑世尊拈

示天花

雪湖老人墨梅

明

焦竑

湘江水落零雨絲羅浮遙遙夢難期華光一逝孤標絕
貌得寒梅第一枝肌膚綽約如冰雪翠袖輕盈弄明月

籬根竹外無人知瘦影橫波共清絕劉生劉生老彌壯
半幅輕綃傳意匠剡溪美人襟抱奇對此悠然得真賞
披圖颯颯生微風春入寒巖雪漸融恍疑身向孤山道
十里林巒香霧中

御定歷代題畫詩類卷八十五